



19. septemperi 2016

UKA2016/15

Naalackersuisut siulittaasuata aammaanermi oqalugiaataa

Naalackersuisut siulittaasuata oqalugiaataanut saqqummiussaannullu qujalluta, aammalu ataatsimoortumik inerititaqarfiusumillu ukiaq manna Inatsisartut ataatsimiinneranni siunnerfinnik pitsaasunik angusaqarumaartugut neriuppugut; nuna inuilu pillugit.

Aasarissup ullui pilluarnartut timimut tarnimullu nukissamik pissarsiuffiusut atorsimavagut, ukialerpoq ukiuuneranilu taaq issi anorersuillu takkuttassapput nukinnik atuiffiusussat. Neriutigaara tamatta nukissaqarluartugut, aasarissup ulluisa pilluarnartumik tunniussai nakooqqutigalugit, aammalu ikioqatigiilluta ingerlassasugut, ilisimagatsigumi inuuffikkuminaatsumi nunaqarluta.

Siulittami nukittuut maani nunami tunngavississimavaatigut inuusinnaanngorluta, inuiaat allat sapigaanni, tamannalumi angusimavaat pinngortitaq uumasuilu ataqqillugit naleqqussartuarnermikkut.

Nunatta inatsisartoqarnikkut ingerlanera avataaniit innuttaasunik malinnaaffiginiarneqarnera ajornarsilluinnartoq radiukkut tusarnaarneqarsinnaanera aaqqittariaqarpoq. Inatsisissat suliagut suunersut inuppassuarnik malinnaaffigineqarsinnaajunnaarput tamannalu oqartussaaqataanerup killeqaleriartuinnarneratut taagaanni ilumoorpoq. Radiokkut aallakaatitsisarneq aaqqinniarli.

Ilanngullugu upperisamut tunngasut qinoqatigiittarnerit peerneqarnerat isumaqatiginngilarput, inummi peqqissuussappat timi tarnilu ataatsimoortariaqarput, timi kisimi ingerlasinnaanngilaq tarneq ilaanngippat, upperisarmi annertuumik nukittorsaatigisarpaput, tullimullu asanninneq siaruartertuartariaqarpoq, tamannalu aamma Kalaallit Nunaata Radioata akisussaaqataafigisariaqarpaa. Timiusaannarmi inuup inuussutigisinnaanngilaa. Timip tarnillu peqqissup, kingunerisarpaa inuiaat nukittuut pilersinneqarnerat.

Nunami siuariartornissamik ataqatigiinnermillu angusaqarniassagutta, inuiaat Kalaallit ataatsimoornissarput massakkut tikittariaqalerparput.

Naalackersuinikkut isummanik anguniakkanillu aporfeqarutta manngertiinnarata isummat ilaat akerlerisagut iisinnaasariaqarpagut, nuna inuilu pillugit, nukippassuarnik peqarpugut, maani inimi, misilittagalippassuit naalackersuinikkut maani inersuarmiipput, tamakkua politikikkut misilittakkat atornagit taava ajugaaniutiinnassaagut? Alloriarniarta, taamaaliunngikkuttami Naalagaaffik Kalaallit Nunaat pilersinnaviangilarput.

Taamatut ataatsimoornata ingerlaannassagutta suli nunasiaateqarnerup annernartui misigiussavagut, maani nunaqavissut Kalaallit akigalugit. Ukiut nunasiaasimanerup annernartui 2021-mi ukiut 300-ingussapput. Kiap kissaatigissavaa kingulissagut suli ukiut 300-it taamatut ingerlaqqissasut. Kingulissagut suli 2321-mut naalagaaffinngornissamut utaqqissappat? partii naleqqamiit taamatut kissaateqanngilluinnarpugut. Tassa naalagaaffinngorniarluta massakkut assatsigut tigulluta aallartinniarta, ikioqatigiilluta ikorfartoqatigiillutalu ingerlalluta. Isumaartoqaruni kukkulluinnassaaq tamanna nammineerluni takutissasoq, aammalu inuiaat allat suliarissagaat naalagaaffinngornissarput. Taamaattoqanngilaq. Nunaqareerpugut nammineq pigisatsinnik Inatsisitigut periarfissaareerpoq namminiilivissinnaaneq. Innuttaasut aperisinnaasariaqarpagut Naalagaaffinngorusunnersut. Aallartinniarta sinnassagaajuannarsinnaanngilagut kiisa kangia aappillerpoq tassa iterniarta, suliarlu paamaarussaasoq nangeqqillugu imminut nukittorsaqatigiilluta nammaqatigiittut.

Nuna ineriartussappat siumukarnissarlu oqaasinnarmik ingerlassanngippat, maani pissutsit tamaasa qulaajaqqissaartariaqalerpagut, ukiorpassuarni ineriartornerput taamak ingerlaannarsinnaajunnaarpoq, suna tamarmi avataaniit tikisitanik ilusilersorneqartuannarsinnaajunnaarpoq, maani pisinnaasagut aallaavigalugit imminut inorsittaarunnaarluta ineriartortariaqalerpugut. Ataatsimoortumik issiaqatigiilluta uagutsinnut tusarnaarluta ilusilersuisariaqalerpugut, nunap inuiisa kissataat aallaavigalugit tusaallugillu. Imaattariaqanngilarmi uagut tusarnaartuinnartut ingilluta aperineqarnatalu anngaaginnartuassasugut. Sumi nunaqarpa nunap inui isiginnaartuinnartut inissisimasut nunami allamiut suliarortitat imminut aallaavigalutik aqqissuussisunik?

Nunami maani pisuussutigut uumaatsut uumassusillillu uagut pigisagut amerlanerpaamik inuiaqatigiinnut iluanarutissanngorlugit aallartitariaqalerpugut. Qeqertarsuatsiaani rubinit ukiorpassuarni annissugaat naak? Sumiipput? Ilisimaneqarpa uagutsinnut iluanarutaassasut?

Akiliisinnaajunnaarnerit ullualunnguit ingerlanerinnaani aaqinneqalersoq tusarparput, taava ilaatigut imminut aperisaqattaarpugut susoqartoruna? Taamaattumik siunissami aatsitassat nalillit tamarmik annertunerpaamik kalaallinut inuiaqatigiinni piginneqataanikkut aatsaat qulakkeerneqarpata aallartitoqartalerniarli, pisuussutigut allat kisimik iluanarutigiuannarsinnaanngilaat, iluanaarnissarsuarmik oqaloriarlutik akiliisinnaajunnaartarnerat tupinnarsiartuinnarpoq.

Aningaasaqarnikkut imminut napatinnissamik anguniaqarpugut kisiannili aamma tupinnarluinnartumik ilaatigut assigiinnik ingerlatsisunik immikkut pilersitsisaqattaarluta umiarsualivinnik ukiorpassuarni ingerlatsineq Royal Arctic Line-mi ingerlanneqarpoq ajunngilluinnartumik nakkutilliinerit ingerlatsinerillu eqqarsaatigalugit, kisiannili tassa massakkut-aasiit akinik akitsorsaaniartutut illuta Sikuki Nuuk Harbour pilersipparput, immikkut pisortalerlugu immikkut siulersuisulerlugu aningaasartuutit nutaat, inassutigerusupparput umiarsualiviliorneq naammassippat Sikuki Harbour atorunnaarsinneqassasoq Royal Arctic Line-mullu pulatillugu. Taava aningaasat aamma amerlasuut sipaarneqarsinnaanngussapput.

Aammalu ilanngullugu uparuarniarparput umiarsualivinnut akiliisarneq sooq Nuummiinnaq atuunnersoq? Tassami aalisartut Nuummiut assersuutigalugu umiatsiaaqqanik aalisagartaminnik usingiarunik akiliisinneqartarput, sinerissamilu taamak ingerlasoqarnani assigiinngisitsineq tamanna Nuummiunut nuannerpaallarunannngilaq, inuimmi assigiimmik pineqarnissaat piumasarissallugu tupinnarpallarunannngimmat. Taamaattumik aalisartunut umiarsualivimmut akiliisarneq tamarmi unittariaqartoq oqaatigerusupparput.

Attanneqarsinnaasumik aaqqissuussisoqassappat aningaasarsiornikkut nukittuumik inissisimalernissarput ilungersuuttariaqalerparput. Aningaasarsiornikkut ingerlatsineq qiviraanni aningaasat nalillillu amerlanerpaat nunatta avataanut anisartut illuatungaanut saatsinniartariaqalerpagut, tassalu aningaasat nalillillu aningaasanngortinneqarneri amerlanerpaat maani nunaqavissunut tutsinneqartariaqalerput.

Sanaartugassanik ingerlatsineq sanaartornerlu isigigaanni sanasut Kalaallit namminersortut amerlanerpaat ingerlaniapiloorput suliassanik agguuassisarneq eqqungalluinnarmat, tamannalu maani nunalinnut Kalaallinut namminersortunut ilungersunarsiartuinnartoq aaqqittariaqalerpoq.

Sooruna Kalaallit namminersortut ingerlaniapiloortut? Akerlianik tikisitat suliassarpassuarnik tigooqqaasut allaat ilaat namminneq suliassaqangaaramik suliassaraluatik allanut tunniussoraat.

Suliassanik maani nammineerluta siunissami ingerlatsilissagutta suleriutsit suliariumannittussarsiussinerit uagutsinnut pisinnaasatsinnut naapertuutumik sinaakkusersorlugit aaqqissuuttariaqalerput. Misilittagaqalersinnaanngilagut sanasortagut Kalaallit namminersortut inorsitsaarlugit. Qineqqusaarnermi tamatta oqaluttuarpugut tamatta suliassat nunaqavissunut nuunneqartariaqalersut, oqaasiinnaajunnaarlugit tassa asu aaqqissuussiniarta!

Inissialiornikkut aserfallatsaaliinikkullu inoqarfiit isorliunerusut ajorluinnartumik inissisimalernikuupput nutaaliernerit illunik tamarmik uninnikuusut oqarluannaraani pitsaaneruvoq nunaqarfiit illoqarnikkut piorsaaffigineqarnissaat ilungersuuttariaqartoq kissaatigaarput.

Kissaatigaarpullu immikkut aningaasanik iluarsaassinissamut immikkoortitsisoqassasoq Kalaallinut sanasut ingerlaannarnissaat ilinniartoqartullu ilinniartitsiinnarnissaat qulakkerneqarniassamat.

Taakkuinnaanngillat. Suli aamma atorfiit allarpassuit Kalaallinik tigooraneqartariaqalerput, maani inuiaqatigiit oqaasii aallaavigalugit suliassat amerlanerpaat ingerlanneqartariaqalerput, ajornaqaaq uagutsinnut inorsilluta maani inooqataaginnarnerput naammagiunnaarniartigut. Atorfiit Kalaallinik ingerlanneqarsinnaasut tamarmik maani nunaqavissunik inuttalersorneqartariaqalerput.

Imarsiornermik ilinniarfeqarpugut nunanut allanut piumasaqaatinut malinnaasumik ilami atuartittagaat umiarsuarni aamma naalaagaasinnaanngorlugit ilinniartinneqartarput, taamaakkaluartoq suvugut? Aasiit uagutsinnut atorata allamiut kisiisa atorniarsaraagut.

Kilisaatini aqumiut qaavanilu sulisinnaasut sooq amigaatiginagillu atornagillu avataaniit tikerartitsiinnassaagut, unioqqutitsillutik aalisartussanik? Suliffeqarfiussuarput Royal Greenland sooq maani nunaqavissunik annerusumik atuinngila? Suliffeqarfiutigut maani Kalaallinik annertunerpaamik atuinissaanik naalakkersuinikkut inatsisiliuullugit piumasaqarfigisariaqalerpagut malinneqartussanik. Ingerlatsisut maani suliffeqarfinnik akisussaaqataasariaqarput maani inuit atornissaannut sulissallutik.

Tamanna imatut aaqinneqassaaq, atorfirmut qinnuteqartut ilinniagaat assigiippata Kalaaleq toqqarneqartuaannassaaq, taamaangippat pisortaq inatsimmik unioqqutitsisut inissinneqarsinnaangorlugu.

Kalaallit ilinniarsimasorpasuit maani ajoraluartumik ilarpasui atunngilagut qinnuteqarpata misilittagaqanngitsut nalilersorneqartarput tamannalu akuersaaginnarsinnaajunnaarparput. Massakkut ingerlavugut maani nunami pissutsinik ilisimasaqanngitsut amerlasoorparujussuit tikerartippagut, inunnik, nunamik, kulturimik ,kinaassutitsinnik, minnerunngitsumillu oqaatitsinnik ilisimasaqanngitsut. Tikisitap inuiaat Kalaallit qanoq ittuunersut atuaannarlugit ilisimalernavianngilai kulturiat, inuusaasiat, nunarsuarmillu isiginnittariaasiat qanoq ittoq aallaavigalugu nunamik ilusilersuisinnaalluni.

Taakkulu misilittagaqanngitsut taaneqarneq ajorput qanorluunniit inuusutsigaluarunik, taamaattumik Kalaallit tassa qaqtinneqartariaqalerput asuli ilisimasassagut avammut annissuinnarsinnaajunnaarparput. Tamatuma qanoq akeqarnera kisitsisinngorlugu ilisimasariaqarlerparput.

Angallannermi kiffartuussinikkut isumaqatigiisummut tupinnartumut aaqqiisoqartariaqarpoq, ilisimavarput nunaqarluta pinngortitamik peqqarniitsumi avannaani isumaqatigiisut qiviassagaanni akuersaarneqanngivissoq malunnarpoq, tassami ukiakkut ukiukkullu imaatigut angallanneq ilorrisimaaginnarluni ingerlanneqarsinnaangivippoq. Taamaattumik nutaamik aaqqiiniutissamik nassaarnissaq piumasarissallugu pissusissamisoortoq oqaatigisariaqarparput.

Qeqqani aamma ukiukkut angallanniartarnek nunaqarfiit eqqarsaatigalugit ilungersunarluinnartarpoq, tamannalu aamma aaqqittariaqarpoq Sisimiut nunaqarfiiniit kujammut Arsuk tikillugu. Tassani ukiukkut imaatigut angallanneq helikopterimik taarserneqartariaqarpoq isumannaatsumik angalasoqassappat.

Assersuutigalugu Arsuk Qeqertarsuatsiaallu navianarluinnartumik umiarsuit unikkaangata angallanneq ingerlanneqalertarpoq. Ukiuunerani sineriak sikusarmat angallanerit annertunerpaamik avaqqutsilluni ingerlanneqalertarput. Taamaattumik silaannakkut ukiuunerani angallanneq taakkunani aamma aallartitariaqarpoq.

Oqaluttuaq una ilumoortoq oqaatigilaarusuppara.

Ukiukkut Qeqertarsuatsiaaniit avannamut ilaasunik angallassisoq imak nalaataqarsimavoq. Sineriak sikuummat avaqqutsillutit Nuuk-mut ilaasunik angallassillutik aallarsimapput, avannerpoq issilluni assullu sermernarluni. Imak sermersimatigipput inuttai ilaasuilu angallami anisinnaajunnaarlutik, aatsaat Nuuk-mut tikikkamik ikiortissarsiorlutik mobil-telefuunikkut aggersaallutik angallatip matui kobiimmik sermiiqqaarlugit ilaasut inuttallu anisinneqarsinnaangorsimapput. Taamatut illersorneqarsinnaangitsumik ilaasunik kiffartuussineq unittariaqarpoq, ukioq-mannalu silaannakkut angallassinissaq ilanngullugu aaqqinneqassasoq piumasaraarput.

Nunatta kujataani aamma ajorluinnartumik isumaqatigiissuteqarneq aaqqittariaqarpoq ukiuunerani imaatigut annerusumik angalasoqarsinnaangilaq anorersuartarnerpaat ilaani angallatinik mikisunik angallavigineqarsinnaangilaq. Taamaattumik silaannakkut aamma angallassisoqarnissaa aaqqittariaqarpoq, pingaartumik aamma nunap isuata eqqaani nunaqarfiit eqqarsaatigalugit.

Tupinnarluinnarpoq taamatut aaqqiiniarneq. Nutaamik isumaqatigiissusiornissaq ajornakusuussaqaq atorunnaarsinneqassappammi aningaasarpassuarnik aamma naleqarsinnaammat, immikkut aaqqiinnissaq tassa akissaqartittariaqassavarput tamannalu Naalackersuisut kukkunerat aamma akikitsuinnaanaviangilaq.

Aluu Airlines-ip uggornartumik atorneqanngitsoornera assut ilungersunartutut tiguarput, silaannakkut angallassinissaminnut naleqqussarsimanagerat assut isumalluarnarpasimmat, pingaartumik helikopterit atugassaat eqqarsaatigalugit. Qeqqani nunaqarfiit Sisimiut eqqaaniit, Kujammut Arsuk tikillugu taakkununga kiffartuussinissaq tunniunneqartariaqarpoq, tassami ukiuunerani immakkut angallassineq ilungersunarluinnartumik killittarmat pingaartumik ukiukkut anorersuartersillugu sikuniartillugulu.

Pituffik aningaasaqarnikkut sunniuteqarnerusumik nunatsinnullu iluaqutaanerusumik ikkorfartuuttaalernissaa pimoorullugu ataatsimoorfigalugu anguniassagipput kissaatigalugu isumalluarfigaarput, kukkusimagutta, kukkusoqarsimappat, taakkua uteqqiaffigiunnaarlugit qanoq angusaqarnerussanersugut suleqatigiissutiginiartigu, uagut aamma pitsanngorsaaniissamut peqataarusuppugut akisussaaqataarusullutalu.

Utoqqartagut neriorsorneqarnikkuupput utoqqalinersiutaat aapparisaq isertitai aallaaviginagit aaqqinneqassasut tamannalu utoqqarpassuarnik tigulluanearpoq. Kiisami atukkamik

pitsaanerusumik inissisimalissagamik. Kisiannili aamma taamak pilluarnartiginngitsoq utoqqarnik amerlasuunik misigineqarpoq, tamannalu ersarissumik naammassineqannginneranut suna pissutaanersoq nassuiarneqassasoq kissaatigaarput.

Unalu issuassavara siorna ukiakkut 2015-mi Naalackersuisut siulittaasuata oqalugiaataaniittoq. Issuaaneq aallartippoq “Utoqqalinersiat pillugit inatsisissatut siunnersuummi anguniarneqarpoq tunngaviusumik utoqqalinersiaqarnissaq aningaasaqarnikkullu sanngiinnerit tapisiaqartinneqarsinnaanissaat. Tunngaviusumik utoqqalinersiat aapparisaq isertitaanut attuumassuteqassanngillat. Utoqqalinersiallit angerlarsimaffimmi ikiorteqarsinnaanerat aamma akeerutsinneqassaaq utoqqaat sivilisunerusumik namminneq angerlarsimaffimminiinnarsinnaanerat periarfissiuunnarlugu.” Issuaaneq naavoq. Taamatut aaqqinissaq partiit tamatta akuersaarparput, aammalu taassuma tamakkiisumik aaqqinneqarnissaa kissaatigaarput utoqqaat amerlasuut salloqittarneqarlutik misigisimasut aaqqiivigineqarniassapput.

Kiisalu sulisinnaajunnaarnersiutillit aamma isornartumik pineqartut aaqqiivigineqartariaqarput, ilaatigut torrallataannigsumik sullissinneq tassani pissutaasoq malunnarmat, piaartumik aamma eqqornerlunneqartut ikiorserneqarniassammata kissaatigaarput.

Suliffissaaleqisut ikiliartornerat nersualaarutigissallugu Naalackersuisunut oqaatigerusupparput, neriunniartalu suli ikioqatigiinnikkut sanaartornikkut aalisarnikkut tamakkiisumik atorluaanikkut, aammalu nunaqavissunik atuinerulernikkut suli ikinnerulerumaartut. Ajunngitsumik ikiliartornerat nersualaarutigerusupparput.

Meeqqanik isumassuinerup annertusiartuinnarnera isumannaatsumillu ataatsimoortumik suliniuteqartuarnissamik anguniagaqarneq ajunngilluinnartutut isigaarput annertuumillu tapersersorlugu, meeqqaanik sumiginnaanarput ajorluinnarpoq angajooqqaallu meeqqaminnut akisussaanerulertariaqarput, inuunerup meeraanerup nuannersuunissaa tamatta ilungersuuttuartaqarparput, tamatsinnummi siunissamullu pingaartorujussuummat minnerunngitsumillu aamma atuarfimmi siumukarnissamut akisussaafferujussuummat.

Qujavugullu suliniutit annertusiartuinnartut Naalackersuisut ingerlammatigik tapersersuissaagut akisussaaqataallutalu, meeqqammi ingerlalluarpata nunatta siunissamut ingerlalluarnerulernissaa qulakkeersinnaanerussavarput.

Innuttaasut piумаaffiginerusariaqarpagut, aammalu tamatta akisussaaqataanerulertariaqarpugut suliffissat suliffillu tamatta paarilluartariaqarpagut, avataaniit tikerartitsiinnerneq allallu pisuutikkunnaarlugit, suliffigut paarillualertariaqarpagut, aatsaat taamaliornikkut akisussaaffimmik annerusumik tigusaqarsinnaagatta, inuiaqatigiinni sulisinnaanerput tamatta atorluartigu.

Pisortanit pisartagaqarnerminngaanniik sulilernermet ikaarsaariarnermi aporfeerarpasuit piiartariaqalerpagut. Imaassanngilarmi sulerusuttoq aporfilersorniarninnaa pillugu sulileraluarneranik arsaaneqartassasoq, pisortanut pisartagaqaleqqinnissaanut qammarlugu.

Kommunit kattussuuneranni malunnarpoq ilaatigut torrallassimanngikkipput, kukkunerlu taanna nassuerutigissallugu aamma pissusissamisoorpoq. Taamaattumik aaqqitassatut taakkartorneqartut aaqqinnissaanut peqataarusuppugut, kommunillu aggorneqarnissaanik Qaasuitsup kommuneata innuttaasullu piumasaa aallaavigalugu suleqataanissarput piareersimaffigaarput. Tamannalu kommunalbestyrelsimut qinersinissaq sioqqullugu aaqqinniartariaqartoq oqaatigerusupparput, tassami aqutsineq innuttaasut nunaqarfiit isorliunerusullu eqqarsaatigalugit ungasippallaalersimavoq aaqqittariaqarlunilu.

Siunnersuutigerusupparpullu Qanaaq Upernavik Uummannarlu kattunneqassasut, taavalu illoqarfiit kujasinnerusumiittut ataatsimut kattullugit tassalu Kangaatsiaq, Aasiaat, Qasigiannugit, Qeqertarsuaq Ilulissallu.

Nunarput niuernerulissappat aalisakkat kisimik aallaavigissagutsigit aningaasarsiornerput killeqarnerussasoq nalunngilarput, imermik sermimillu niuernerit annertusassappata aallaqqaamut akitsuutit peerlugit ingerlatsissagutta aallartinniartunut pilerinartunngorlugu aaqqissuussinissarput eqqarsaatigisariaqarparput. Ingerlallualerpata akitsuutit atuutsinneqarsinnaapput, tassami aamma avammut niuerutitta tuniniarnissaat ingerlalluassappat annertusaanissat saneqqunneqarsinnaanngimmata.

Takornariartitsinermi iliuusissat soorunami aamma soqutiginarartilluarpagut nunaqarpugut asseqanngitsumik pinngortitap inuup assaanik aserorterneqanngitsoq killeqanngitsoq pigaarput. Annertusaanissami aningaasat amerlanerpaat aamma nunaqavissut siuariartornissaanut sangutinnaartariaqarput tapiissinnanerit ammanerulersillugit pingaartumik isorliunerusut nunaqarfiillu eqqarsaatigalugit.

Kuuit eqaloqarfiit qangaanilli ilami itsarli kinguariinnik inatsisitigut allassimanngikkaluartunik “pigineqartarput” ukiorpassuarni paarineqartarput mianeralugit

erligalugillu eqqunngitsumik atuisoqalerpat oqarfigineqartarput ,tamassumalu kinguneraa eqaloqarfiit paarilluarneqartut eqaloqartuarnerat, kuup supinerata kinguneranik ilaatigut kuuk allanngortarpoq, iluarsaattariaqalertarluni tamatumalu kingunerisarpaa eqaluit majornissaminnut kuukkut majorfissaqartuarnissaasa qulakkeerneqartarnerat ,tamakkulu kinguariit “ Piginnittut” sulilluarnerisigut eqaloqarfiit paarilluarneqartarput. tamakkua mianerinagit takornarissanut ammaassinniarnert akuersaanngilagut, nunaqavissut ingiarneqassapput takornartaajunnaarnikuuvormi oqarfigineqartarsimasut, tamaani eqalunniassanngitsut nammineq takornarissanut tamanna atorniaramikku taamaliornert akuersaanngiivippagut itigartinneqassasullu kissaatigaarput.

Qeqqata kommuniani taamatut ammaassiniarnert partii naleqqamiit akuerinnngivippagut, Itillip kujaaniittoq qaangaanilli kinguariinnik atorneqartuartut takornarissanut nunarujussuup tunniunniarneqarnera itigartivikkipput oqaatigissavarput.

Inuusuttut ilinniatitaanikkut qaffassaaffiginiarneqarnerat annertuumik taperserparput isumalluarluta ilinniagaqarlutik aallartittartut suli amerliartuinnassasut.

Tunisassiornikkut aalisakkanik ineriigaanerusunik suliaqalertariaqarpugut, naleq aningaasanngorlugu toqqaannartumik maani pilersissinnaasagut suliffissallu amerlanerusut pissarsiarisariaqarpugut, aningaasanimmi amigaateqartugut oqariartorfigineqartuaratta sulinerulertariaqarpugut aningaasaateqarneruleruttami inuit aamma ingerlalluarnerulissapput.

Ilagiit suliniarfigineqarneranni sulisussanik amigaateqarnerput aallunnerusariaqalerparput pattattut ajoqit palasillu amigaatigineqartut aaqqiffigineqartariaqarpugut taamaattumik Naalackersuisut kaammattussavagut sulisussanik ilagiinni amigaateqarneq piaartumik qaangerniaqqullugu.

Taamatut oqaaseqarluta Naalackersuisut siulittaasuata oqalugiaataanut qujavugut, isumannik ersarissanissatsinnut periarfissimmatigut.

Suliassat annertoqaat inuttut ajornartorsiuterpasuarnik peqarpugut aaqqinniagassatsinnik, isummat assigiinnngissinnaasut aporfigiunnaarlugit suleqatigiissutissagut ujartigit. Uagullu peqataarusuppugut aamma sunniuteqarluta akisussaaqataanissatsinnut. Isummat ilaat aporfiginarnagit suleqatigiissutissagut ujarusuppugut, inuiaqatigiinni killiffik pitsaanerulissappat aporfiit pitarlugit suleqatigiittariaqaleratta ataatsimut alloriartoqarnissaanut peqataarusukkatta.

Tamatumunnga partii naleraq piareersimavoq.